



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec



PROCESVERBAL

Nga mbledhja e rregullt e kuvendit komunal të Rahovecit, e mbajtur më **28.12.2022 (E mërkure)** me fillim në ora **10:00**. Mbledhjen e kryesoi Kryesuesi i Kuvendit z.**Defrim Kafexhiu**. Konstatoi se ka kuorum për mbajtjen e mbledhjes..

Kryesuesi – Fillimisht, përshëndetje për të gjithë. I nderuar nënkryetar i komunës z. **Fatmir Iska**, të nderuar anëtarë të kuvendit komunal, drejtorë të drejtorive komunale, media, të nderuar qytetarë të komunës së Rahovecit, kjo është seanca e dymbëdhjetë (12) për këtë vit kalendarik. Komiteti për Politikë dhe Financa në mbledhjen e mbajtur me 16 dhjetor, për këtë seancë ka përgatitur këtë

REND DITE

Njësia Nr./Br./No 01(Kuvendi i Komunës)

Nr./Br./No 01/23 Nr. ifaq/Br.str/No.pg 02

Data/Datumi/Date 30 01 2023

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Shqyrtimi i raporti mbi realizimin e planit për vitin 2022 si dhe informatë mbi Planin vjetor të prokurimit publik 2023;
4. Shqyrtimi i Raportit të Punës të Kryetarit të Komunës për vitin 2022;
5. Shqyrtimi dhe miratimi i propozim-vendimit për Planin e Punës të Kryetarit të Komunës së Rahovecit për vitin 2023;
6. Shqyrtimi dhe miratimi i propozim-vendimit për Planin e Punës të Kuvendit Komunal për vitin 2023;
7. Shqyrtimi dhe miratimi i propozim-vendimit për Planin e Punës të Këshillit Komunal për Siguri në Bashkësi (KKSB) për vitin 2023;
8. Shqyrtimi dhe miratimi i propozim-vendimit për Planin e Vlerësimit të Rreziqeve nga fatkeqësitë natyrore dhe fatkeqësitë e tjera;
9. Shqyrtimi dhe miratimi i propozim-vendimit për Planin e Transportit Rrugor 2022 – 2027;
10. Shqyrtimi dhe miratimi i propozim-vendimit për Planin e Mobilitetit Urban 2022 – 2027;
11. Shqyrtimi dhe miratimi i propozim-vendimit për mbulimin e shpenzimeve të varrimit për vitin 2023;
12. Shqyrtimi dhe miratimi i propozim-vendimit për miratimin e Simbolit Përkujtimor të Gjenocidit në Kosovë;
13. Shqyrtimi dhe miratimi i propozim-vendimit për ndryshimin dhe plotësimin e vendimit 01 Nr.263/22, i datës: 25.01.2022, për themelimin e Komitetit për Politikë dhe Financa;
14. Shqyrtimi dhe miratimi i propozim-vendimit për shpalljen në interes të përgjithshëm të parcelës P-01041-1 – në zonën kadastrale Xërxë;
15. Shqyrtimi dhe miratimi i vendimit për ndryshimin dhe plotësimin e vendimit 01 Nr. 338/22 i datës 29.06.2022 për dhënien në shfrytëzim afatshkurtër;
16. Shqyrtimi dhe miratimi i vendimit për ndryshimin dhe plotësimin e vendimit 01 Nr. 341/22 i datës 29.06.2022 për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës;

17. Shqyrtimi dhe miratimi i raportit mbi regjistrimin dhe vlerësimin e dëmeve në amvisëri, ekonomi familjare dhe biznese, të shkaktuara nga vërshimet e shiut me datë 17 shtator 2022;

18. Informatë rreth gjendjes në terren pas të reshurave të fundit në territorin e komunës së Rahovecit.

Pikat shtesë;

~ Plotësim-ndryshimi i vendimit 01 Nr.264/22 i datës 25.01.2022 për themelimin e Komitetit për Komunitete;

~ Plotësim-ndryshimi i vendimit Nr.392/22 i datës 25.11.2022 për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës.

Kryesuesi – Para rendit të ditës e kemi edhe një pikë shtesë, dhënien e betimit të anëtares më të re të kuvendit, Dafina Gashi.

Dafina Gashi – Faleminderit kryesues, përshëndetje për të gjithë. “Unë Dafina Gashi, betohem se do t’i kryej me nder, besnikëri, paanime, me ndërgjegje dhe sipas ligjit detyrat, do t’i ushtroj autorizimet e mia si anëtare e kuvendit të komunës së Rahovecit, në mënyrë që të sigurohet kushtet për jetë të qetë për të gjithë”

Burim Krasniqi – Përshëndetje kryesues, nënkryetar, drejtorë, kolegë asambleistë. Pika 9 dhe 10, Transporti Rrugor dhe Plani i Mobilitetit nuk konsideroj që kanë vend në një seancë me kaq shumë pika (18) sepse me 28 dhjetor të aprovohet plani i transportit dhe i mobilitetit për vitin 2022-2027 nuk ka logjikë, na kthehet pas, duhet të jetë 2023-2027. Propozoj të tërhiqen këto dy pika për seancën e radhës në janar.

Përparim Krasniqi – Përshëndetje për të gjithë. Burim, janë afate ligjore që nuk mundemi t’i ikimi. Kemi pyetur edhe në MPL, vendimi që merret në datë të caktuar, llogaritet si vit paraprak, vendimi llogaritet prej sot.

Burim Krasniqi – Para 4-5 muajve MPL n’a ka kthyer një vendim sepse e kemi llogaritur 2022, kanë thënë që duhet 2023, sepse 2022-ta mbyllet. Planet duhet të jenë 2023-2027. Kryesues, të kërkoj ta vendosësh propozimin në votim.

Përparim Krasniqi – Burim, je gabim. Nuk ka qenë viti 2022, por 2021. MPL ka kërkuar të jetë 2022-2027 (periudha 5 vjeçare).

Kryesuesi – Propozimin e Burim Krasniqit po e vendosim në votim, për largimin e pikave 9 dhe 10 nga rendi i ditës, kush është për?... Kundër?... Abstenim?... Atëherë pikat shtyhen për seancën, meqenëse kemi shumë volum në këtë seancë (me 14 vota për, 13 kundër).

Kemi edhe dy pika shtesë nga ekzekutivi;

~Plotësim-ndryshimi i vendimit 01 Nr.264/22 i datës 25.01.2022 për themelimin e Komitetit për Komunitete;

~Plotësim-ndryshimi i vendimit Nr.392/22 i datës 25.11.2022 për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës.

Kush është për?... Me shumicë unanime shtohen edhe këto dy pika në rend dite.

Rumir Zhuniqi – Faleminderit kryesues. Një njoftim; Pas dhënies së dorëheqjes nga Besmire Bytyqi (shefja e grupit të asambleistëve të AAK-së), AAK-ja do të përfaqësohet nga Hasan Përboqi. Drejtoreshës së re i urojmë suksese në emër të grupit.

Kryesuesi – Atëherë i urojmë suksese Hasanit dhe Besmires. Po e vendosim miratimin e rendit të ditës në votim, kush është për?... Me shumicë unanime miratohet rendi i ditës për seancën e sotme.

1.Shqyrtimi dhe miratimi i procesverbalit nga mbledhja e kaluar;

Kryesuesi – A ka dikush diqka rreth procesverbalit?... Nëse jo, atëherë po e vendosim në votim, kush është për?... Me shumicë unanime aprovet procesverbali i mbledhjes së kaluar.

2. Pyetjet dhe përgjigjet në pyetjet e kuvendarëve;

Rasim Fazliu – Faleminderit kryesues, përshëndetje për të gjithë. Siç e dini në disa vendbanime të komunës së Rahovecit ka pasur vërshime dhe dëme të mëdha. Jam i informuar që komuna ka formuar komisionin për vlerësimin e dëmeve. Kam disa kërkesa nga shumë qytetarë. Disave prej tyre nuk iu kanë kompenzuar dëmet, ku qëndron problemi?... Pse disa bujqë nuk janë kompenzuar për dëmet nga vërshimet, dëmi është faktik, dhe çka do të ndodh më pas?

Burim Krasniqi – E kam të njëjtën çështje që e kam ngritur në seancën e fundit, për Drejtorinë e Urbanizmit. Fjala është për gjurmimin ose fillimin e procedurave për marrjen e gurit mbi rrugën Rahovec-Suharekë. Bujqit dhe banorët e asaj zone kanë shprehur shqetësim të madh. Me 18.12.2018, Drejtoria e Urbanizmit me vendimin 266 jep një përgjigje dhe në fund thotë: Zona sipas PZHK-së është e destinuar si zonë me prioritet për bujqësi dhe pyje, jo prej marrje të gurit. Përkundër kësaj, me 21.04.2019, kompania në fjalë ka arritur të siguroj një pëlqim prej Ministrisë së Bujqësisë Pylltarisë dhe Zhvillimit Rural për nxjerrje dhe shfrytëzim të gurit. Me 15.02.2020 ka qenë një parashtrësë për kundërshtim që 61 banorë të zonës me nënshkrim iu kanë drejtuar komunës dhe kanë kërkuar që mos të lejohet gurrthyesi. Përgjigja ishte kjo: Duhet theksuar se kjo parashtrësë nuk është hartuar në formën e duhur ligjore dhe është mjaftë e pakuptueshme si dhe është e pa noterizuar te noteri. Në anën tjetër e kemi një vendim që Drejtoria e Urbanizmit e ka lejuar kompaninë të merr gurin e thyer dhe është në kundërshtim me vendimin e vet që thotë që zona është e destinuar për pyje. Vendimi i fundit thotë që nuk lejohet vendosja e makinerisë, por nuk e ndalon marrjen e gurit. Si e shoh komuna skenarin e kësaj çështje?... Nëse është nevoja e një vendimi të asamblesë komunale për moslejimin apo lejimin e shkeljes së PZHK-së, vendose në asamble dhe e votojmë.

Fahrije Lushi – Faleminderit kryesues, të nderuar gjithë të pranishmit. Me 29 mars 2021 nga ky kuvend është nxjerrë një vendim për subvencionimit dhe mbështetjen e të gjitha grave dhe nënave të komunës tone, pa marrur parasysh se ku lindin ato, jo vetëm në QKMF në Rahovec. Çka nëse kryetari nuk i ka subvencionuar të gjitha gratë brenda saj periudhe?... Nga ky vit është sjellë një propozim i ri që nënat dhe gratë që lindin në QKMF në Rahovec, do të subvencionohen me nga 300euro, ky vendim është mirë që nuk e ka marr mbështetjen sepse dikush edhe për qejf mund të shkojë për lindje jashtë Rahovecit. Kërkoj nga kryetari sqarim.

Kryetari – Përshëndetje për kryesuesin, nënkryetarit, drejtorët, anëtarët e kuvendit. Nuk isha këtu nga fillimi, më vjen keq që dy pika të rendit të ditës janë hequr, ato janë plane që i kanë kaluar të gjitha procedurat dhe janë dokumente të rëndësishme. Burimi ka paraqitur shqetësimin e një gurrthyesi. Ka skaduar ajo kontratë d.m.th nuk është i njëjti operatorë, ndërkohë është paraqitur dikush tjetër të operojë në atë zonë dhe urbanizmi jonë e ka lëshuar një vendim që e ka përcaktuar përkatësinë e pronës. Operatori ka vazhduar me punën e tij, të nxjerrë licencën prej Këshillit të Pavarur për Miniera dhe Minerale dhe ka ardhur një moment kur ai ka kërkuar leje pune-ndërtimi, kuptohet Drejtoria ia ka refuzuar kërkesën. Vendimi është i këtij viti që aty nuk mund të opertohej tutje, as me shpime as me vendosje të makinerive. Ajo mund të bëhet edhe zonë ndërtimore, por jo e dedikuar për gurrthyes sepse konsiderohet e papërshtatshme për veprimtari të tilla. Ky vendim do të zbatohet edhe në atë moment kur bëhet ndonjë vendim tjetër të ri, për të cilin nuk ka asnjë argument. Kjo është situata reale.

Vendimi i subvencionimit të lehonave vlen për një vit dhe është në përgjegjësinë e kryetarit të komunës t'i subvencionojë gratë të cilat lindin në Rahovec dhe në i subvencionojmë me 300euro. Qeveria e Republikës së Kosovës i subvencionon që lindin kudo në Kosovë. Megjithatë në maternitetin e Rahovecit ka kushte të mira, ka raste që edhe prej Malishevës vijnë të lindin në Rahovec. Subvencionimi do të vazhdojë edhe në vitin e ardhshëm me kompetencë të kryetarit të komunës duke u mbështetur në ligj.

Burim Krasniqi – Janë 3 vendime të Drejtorisë së Urbanizmit në periudha të ndryshme kohore; 266 (18.12.2018), 296 (18.12.2019), 09 (17.01.2022). Vendimi i parë thotë: Kjo zonë është e destinuar me prioritet për bujqësi dhe

pye. Vendimi i dytë: Vërtetimi i lëshuar vlen për shfrytëzimin për investimin e shfrytëzimit të gurit dhe nuk përdoret për qëllime të tjera. Vendimi i tretë: Refuzohet kërkesa e kompanisë, për dhënien e pëlqimit për vendosjen e makinerisë për thermosje dhe separim, jo edhe makinerisë për gjermim, i bie që kjo nuk e ndalon gjermimin. Nga inspektoriati, kërkoj verifikimin se është duke vazhduar shpimi apo jo?

Albnor Mullabazi – Faleminiderit kryesues. I nderuar kryetar, nënkryetar, kolegë, asambleistë. Burim, me 21.10.2022 ka qenë Inspektoriati i Agjencisë Pyjore në komunën e Rahovecit. Ka dalur në terren dhe i ka marrur lëndët. Vërtetimi i 2019-tës tregon gjendjen e tokës sipas PZHK-së. Komuna e Rahovecit nuk lëshon leje, të gjitha këto procedura i kryen Agjencioni Pyjor. Personi në fjalë ka marrë leje mjedisore në Ministri të Mjedisit. Inspektoriati ka dalur në terren dhe ka vërtetuar që edhe kjo leje mjedisore është lëshuar gabimisht. Vendimi i 2022, ka ardhur pas kërkesës për vendosjen e makinerisë, nuk ka qenë kërkesa për ushtrim të veprimtarisë. Të njëjtën e kemi refuzuar.

Fihrije Lushi – Fjalët që kryetari i përmendi: agjitacionet, mashtrimet e propagandat, asnjëherë LDK në kuvend nuk i ka bërë. Në anën tjetër, nuk është në karakterin tim personal të jem kundër atyre grave që kryetari me kompetencë të tij i subvencionon. Por, çka nëse ajo grua është nga Ratkoci ose Malësia e vogël dhe detyrohet të lind në Gjakovë? A është edhe ajo taksapaguese e komunës së Rahovecit?

Kryetari – Unë e përdora termin “gratë që kanë gjendje të zakonshme, të mirë shëndetësore” dhe kanë mundësi të shkojnë për lindje në maternitetin në Rahovec, mirë është të shkojnë aty. Për raste tjera të lindjes që mund të jetë e komplikuar, atëherë ato mund të shkojnë edhe diku tjetër. Qëllimi i vendimit për subvencionim ka të bëjë me atë që ta forcojmë maternitetin në Rahovec dhe nuk bëhet fjalë as për ndarje as për diskriminim të grave. Burim Krasniqi po i përgjigjem: Është një kërkesë për vendosjen e makinerive, nuk e dijmë a janë makineri për gjermim, hulumtim, minim, apo pajisje për thyerje. Por, fakti që vendimi taksativisht thotë që: Nuk keni të drejtë të vendosni pajisje aty. Përndryshe, drejtori Albnor Mullabazi e tha qartë që është pronë që menaxhohet nga Agjencioni Pyjor e Republikës së Kosovës.

Sejfullah Sejfullahu – Përsëritje kryesues, kryetar, drejtor, të gjithë. Ne si Krushe jemi mbi 7 mijë banorë, investime janë bërë pak. Po dalim te heqja e kodeve nga qeveria për dy investime që kanë pasur të ndodhin. Pa hyrë në detaje, e kam një propozim: Në Krushë të Madhe ka vend të mjaftueshëm, t’i përdorim të gjitha mekanizmat, kryetarin, Visarin, Avdullah Hotin, Yllza Hotin dhe ta bëjmë një kërkesë, ta ndërtojmë një stadium në Krushë të Madhe, që derisa të bëhet zgjidhja për stadiumin e qytetit, klubet e Rahovecit le të vijnë t’i zhvillojnë ndeshjet në Krushë (10km larg). Në fund, stadiumi i mbetet Krushës.

Vlora Vuçiterna – Çmega – Përsëritje për të gjithë. Rreth lindeve të grave në Rahovec: Kryetar, si mendon t’i inkurajosh gratë të lindin në maternitetin e Rahovecit përderisa ky maternitet nuk i plotëson kushtet. Gjinekologë joçdoherë ka të pranishëm, Neunatolog nuk ka dhe mos të harrojmë që kemi të bëjmë me dy jetë dhe jo vetëm me jetën e nanës.

Edona Kryeziu – Përsëritje i nderuar kryetar. Kryesues, faleminiderit për mundësinë e fjalës. Të nderuar të pranishëm, sot, dua ta ngrisë shqetësimin e disa prej banorëve të fshatit Xërxë te qendra grumbulluese të frutave dhe perimeve ish matrks. Problemi është rreth çështjes së rrugës, gjendje e vështirë dhe është një rrugë mjaftë e frekuentuar. Keq e përjetojnë fëmijët që e shfrytëzojnë këtë rrugë si alternativë më të shkurtër për të shkuar në shkollë. Kërkesë e banorëve është që të bëhet rregullimi sa më i shpejtë i mundshëm i asaj rruge dhe pastrimi kanalit aty afër.

Kryetari – Fakti është ky, Krusha e Madhe e meriton stadiumin, palestrën sportive dhe shumë investime tjera. Investime ka pasur, por nuk i kemi zgjidhur të gjitha shqetësimet e banorëve sa i përket investimeve. Vitet 2020-2021 kanë qenë vitet e pandemisë me shumë sfida. Viti 2022 është i ngarkuar me pasojat e pandemisë, me agresionin Rus, me ngritjen e çmimeve etj ... Sa i përket stadiumit në Krushë, komuna mund të bëjë diçka, nuk mund të bëjë stadium me standarde shumë të larta, por mund ta bëjë një stadium të përshtatshëm për lojë. Vlora, është e

vërtetë që ende nuk kemi Neonatolog. Poashtu është e vërtetë që në janar kemi të drejtë të hapim konkurs për rritje të personelit shëndetësor në komunën tonë. Materniteti pas renovimit është në gjendje shumë më të mirë, përkundër asaj që ka nevojë për kuadro. Lindjet që ndodhin aty deri më tani rezultojnë të suksesshme dhe nuk e di për ndonjë situatë problematike që ka ndodhur. Përsëri po them, i inkurajoj gratë që të lindin në maternitetin në Rahovec, kurse neve na mbetet që secilën ditë t'i krijojmë kushtet sa më të përshtatshme dhe sigurtë.

Sa i përket investimeve, do t'i rrijmë gati kësaj pune dhe do të kërkojmë që Rahovecit t'i rikthehen projektet e reja.

Leonard Morina – Faleminderit kryesues. Përhëndetje për të gjithë. Një pyetje për drejtorin e arsimit; Në vitin 2020 është nënshkruar një kontratë për një pako pedagogjike (furnizimi ka qenë për 3 vite, deri 2023). Te plani i prokurimit e vërejtja që janë ndarë 20.000euro edhe për vitet e ardhshme për paket pedagogjike, nëse në 2020 ka qenë 10.700euro, tani për 5 vite parashihen 20.000. Te kjo kontratë, për 5 vite parashihet ditari personal, listat e kontrollit dhe planet ditore. Sipas kësaj gjendje i bie që për 5 vite do të shkojmë në mënyrë “shabllon” me ditar personal dhe me listë të kontrollit. A do të ketë lëvizje Drejtoria e Arsimit?

Eqrem Spahiu – Faleminderit kryesues, përhëndetje për të gjithë. Kryetar, ne si Optrushë kemi problem me ujë për pastrim (nuk po flas për ujë të pijshëm), nuk kemi ujë në fshatin Optrushë, a do të ketë diçka për vitin 2023?

Kryetari – E vërtetë është e hidhur dhe nuk mund ta lë pa e thënë. Qeveria e Kosovës, Ministria e Ekonomisë nuk e ka dhënë asnjë cent për KRU Gjakovën për këtë vit për investime kapitale. Ju e dini që kompetencë për nisjen, menaxhimin dhe mbylljen e procedurave që kanë të bëjnë me furnizim të ujit të pijshëm i ka KRU Gjakova. Ne kemi një memorandum mirëkuptimi dhe në momentin kur KRU Gjakova ka mjete, ne jemi të gatshëm t'ia ofrojmë 49%, që realisht nuk e kemi obligim ligjor, por vetëm t'i ndihmojmë qytetarëve. Njëjtë vlenë për Optrushën, Zaqishtin, Hoçën e Madhe, Senocin dhe Drenocin. Ky është pozicioni jonë parimor. Në parim i kam mbetur borxh për përgjigje Rasim Fazliut, do ta merr me shkrim edhe nga Drejtori i Bujqësisë. Të gjitha procedurat të cilat lidhen me krijimin e komisioneve, me daljen e tyre në terren, me evidentimin e dëmeve të shkaktuara në bujqësi, infrastrukturë publike, biznese, amvisëri, janë kryer me kohë nga ana jonë. Me dëmet në bujqësi kemi anomali, sepse ka dalur një udhëzim administrativ pas njëzet e sa ditësh që kanë ndodhur vërshimet dhe ky udhëzues ka nxjerrë situatë të një lufte të madhe juridike me komisionin e ankesave. E dini që 200 vetë janë përfitues dhe ata kanë filluar t'i marrin mjetet, por edhe 300 të tjerë janë të refuzuar, ka prej atyre që janë refuzuar e që janë në kufij në një zonë. Këtë situatë e kemi adresuar në mënyrën më serioze të mundshme, dje ka shkuar ankesa e fundit për 32 tjerë që janë refuzuar. Pra, jemi përfitues por kemi shumë të refuzuar. Presim përgjigje dhe informacione të kthyer nga ankesat që i kemi bërë në bashkëpunim me zyrën ligjore.

Avni Morina – Faleminderit kryesues. I nderuar kryetar, nënkryetar, anëtarë të kuvendit, drejtorë. Një përgjigje për çështjen e pakos pedagogjike. Do ta bëjmë zgjerimin e kësaj pakoje edhe për klasët e gjashta deri në klasën e dymbëdhjetë. Ky zgjerim do të bëhet prej fillimit të vitit 2023. Kjo pako pedagogjike iu shërben prej edukatorëve deri te klasët e dymbëdhjeta dhe përmban: Planet ditore, listat e kontrollit, ditarët personal, instrumentet e vlerësimit dhe elementet tjera, që janë material i nevojshëm dhe i duhur për mësimdhënësit. Pakoja 10.000euro e kemi shpenzuaq për Pakon pedagogjike prej klasës 0-5 (parafillor-klasa 5). Këto 20.000euro tjera i kemi tash për një vit (2023), sepse na duhet pakoja pedagogjike për të gjithë mësimdhënësit dhe për të gjitha ciklet.

Kryesuesi – Përhëndetje për kryetarin, nënkryetarin, anëtarët e kuvendit, drejtorë të drejtorive. Po e mbylлим një vit të parë kalendarik me plotë sfida para vetës. Si kryesues jam krenar për atë që kam dhënë në kuvend, ndoshta edhe jomjaftueshëm duke marrë parasysh potencialin që e kemi. Faleminderime për diskutimet, debatet dhe produktivitetin e treguar brenda asamblesë. Për këtë vit kalendarik, kuvendi komunal po e mban seancën e 12-të, poashtu ka mbajtur edhe 11 mbledhje të KPF-së, 5 të Komunitetit të Komuniteteve, 3 mbledhje të Komitetit për Arsim dhe 3 të Komitetit për Shëndetësi. Në këto 12 seanca të rregullta të kuvendit pa e përfshirë seancën e sotshme, kuvendi ka miratuar 85 vendime. Ju falenderoj të gjithëve për bashkëpunimin dhe ju ftoj për reflektim kundrejt kërkesave, propozimeve dhe kritikave që vijnë nga anëtarët e kuvendit. Kohëve të fundit ishim pjesë e një debati që për

mendimin tim ka qenë i panevojshëm dhe pa ndonjë të arritur, ku tentimi i faturimit i përgjegjësisë te niveli qendror është i paqëndrueshëm dhe irrelevant sidomos kur të vie prej asamblesë komunale. Koha do ta dëshmojë që zotimet publike nga qeveria qendrore do të finalizohen, duke përfshirë kodet (Stadiumin e Qytetit dhe Qendrën Multifunkionale). Në emrin tim, iu uroj një fundvit të bukur dhe fillimvit të mbarë për të gjithë. I uroj veteranët e luftës, familjet e dëshmorëve dhe të gjithë atyre që dhanë kontribut që ne sot këto festa t'i festojmë të lirë. Urime 2023-ta. Vazhdojmë me pauzë deri në orën 13:00 ...

Kryesuesi – Po vazhdojmë me seancën. Një lutje për shefat e grupeve që t'i rrijnë gati anëtarëve të tyre të partisë, që të mos vonohen në mbledhje.

Hasan Përboqi – Faleminderit kryesues. Në emër të grupit të asambleistëve të aleancës, kërkojmë rikthimin dy pikave që janë larguar nga rendi i ditës (pika 9 dhe 10). Ne si grup e konsiderojmë që këto pika janë larguar pa arsye të qëndrueshme, por vetëm që dikujt i “tekjet”.

Kryesuesi – Faleminderit Hasan. Pavarësisht formës së mëhershme të largimit të këtyre dy pikave, ka marrë mbështetjen e kuvendit. Arsyeja ka qenë volumi i madh i rendit të ditës.

Lirigzon Kastrati – Faleminderit. Propozuesi i këtyre dy pikave është shefi i grupit të asambleistave të LDK-së, i cili me plotë arsye e tha që këto pika duhet të shtyhen në seancën e radhës duke kërkuar trajtim të veçantë të pikave në fjalë.

Rasim Fazliu – Faleminderit kryesues. Mendoj që ka qenë mungesë komunikimi mes vete. E kam mbështetur në formën e asaj që ka shumë pikë për diskutim sot. Përndryshe, në çoftëse komuna dëmtohet në performance në mos aprovimin e këtyre dy pikave, atëherë është dëm ta bëjmë një gjë të tillë.

Kryetari – Më vjen keq që prej fillimit e thash që është bërë keq që janë larguar atë dy pika. Arsyeja më e bazuar është që janë dy plane që i kanë kaluar të gjitha procedurat, madje në njërin prej planeve në debat publik ka qenë edhe shefi i grupit të LDK-së dhe ka dhënë kontributin e tij në Planin e Mobilitetit. E kuptoj që rendi i ditës është voluminoz, por është edhe raporti i performances që e poenton kuvendin e komunës dhe komunën e Rahovecit.

Kryesuesi – Faleminderit kryetar. Atëherë po e vendosim në votim, kush është për?... Kundër?... Abstenim?... Atëherë me 16 vota “për” këto dy pika rikthehen në rend të ditës. Si asamble komunale duhet t'i shmangemi situatave të tilla dhe të mos mundohemi t'i përsërisim.

3. Shqyrtimi i raportit mbi realizimin e planit për vitin 2022 si dhe informatë mbi planin vjetor të prokurimit publik 2023:

Astrit Mullabazi - Sa i përket planifikimit paraprak të prokurimit për 2023 dhe duke pasur parasysh që komuna ka aprovuar buxhetin për vitin 2023, duke u mbështetur në nenin 8-të paragrafi 1 të ligjit të prokurimit; Sa i përket planifikimit paraprak, duhet të dorëzohet me shkrim tek zyrtari kryesor administrativ i autoritetit kontraktues apo te kryetari i komunës, jo më larg se 30 ditë para fillimit të vitit fiskal. Me datë 30.11.2022 është bërë planifikimi paraprak i prokurimit për vitin 2023 dhe ia kemi dërguar kryetarit të komunës. Ky planifikim përfshin furnizimet, shërbimet dhe punët që do të realizohen gjatë vitit 2023. Planifikimi përfundimtar i prokurimit për 2023 sipas ligjit të prokurimit publik bëhet 15 ditë pas miratimit të buxhetit në nivel qendror. Sa i përket raportit vjetor për kontratat e nënshkruara publike, raporti nuk është final për shkak raporti final dërgohet në KRPP (Komisioni Rregullativ i Prokurimit Publik) jo më larg se 30 janari i vitit 2023. Gjithsej procedurat e prokurimit për vitin 2023 janë 63. Vlera e tyre e parashikuar është 14.890.732euro.

Vlora Vuçiterna – Çmega – Faleminderit. Deshta të ndërlidhem te plani i prokurimit 2023, specifikisht te kontratat për furnizim me uniforma të stafit shëndetësor dhe teknik. E kam pak të paqartë sa puntorë shëndetësor bashkë me stafin i ka QMF, sepse duke e ditur që vlera e një uniforme kushton 10-20euro, nuk besoj që komuna jonë i ka 1000 puntorë në total meqenëse kontrata parasheh 10.000euro. Nga ana tjetër, parashihet kontratë me vlerë 15.000euro për furnizim të laboratorit me material shpenzues dhe duke pasur parasysh çmimin e lartë të reagjentëve mund ta kuptojmë sesa i ulët do të jetë numri i analizave që do të bëhen në QKMF. Pyetje ime është rreth asaj që a i jepni

rendësi të njëjtë si furnizimit të uniformave, si materialit shpenzues në QKMF?. Te kontrata për karrika stomatologjike, parashihet një kontratë në vlerë 24.000euro, ndërsa vitin e kaluar ka qenë vetëm 6700euro. Sipas çmimit të tregut me këtë vlerë mund të blihet 5-6 karrika stomatologjike. Më konkretisht ku parashihen të shpërndahen këto karrika?

Lirigzon Kastrati – Një pyetje - sqarim nga menaxherin e prokurimit, po i shoh disa kode këtu “Riparimi i shkollave” “Furnizimi dhe montimi i dyerve në shkolla” “Furnizimi dhe rregullimi i xhamave”. Pse janë të ndara në kode dhe qka përfshihet këtu?

Astrit Mullabazi – Kodet ndahen në 3 kategori sipas ligjit të prokurimit; Furnizime, shërbime, punë. Sa i përket furnizimit me xhama dhe rregullimi i tyre është tender dhe kompani e veçantë, kurse riparimi nëpër shkolla është te kodi “punë” që ka të bëjë me ndërtimin e fushave sportive, riparimi i oborreve të shkollave etj... Sa i përket Vlorës, çdo drejtori te zyra e prokurimit e ka përcjellë veçmas planifikimin për 2023 dhe brenda atij planifikimi janë për bërë punët. Sa i përket Drejtorisë së Shëndetësisë për rekuizita e material, më së shumti të përgjigjet drejtoresha.

Kryetari – Vlorë, shëndetësia ka një numër të caktuar të punëtorëve (154), numri i punëtorëve mund të rritet. Pse janë të planifikuar 10.000euro për uniforma, kjo nuk d.m.th që shpenzohen poaq. Ne kemi kërkesa për 3-4 karrika stomatologjike, pse në këtë vit më pak, e në vitin e ardhshëm më shumë?. Sepse mundësitë më të mëdha i kemi vitin e ardhshëm, buxheti për mallra dhe shërbime rritet.

Kryesuesi – Faleminderit kryetar. Nëse nuk ka diskutues tjetër, vazhdojmë me pikën e katërt;

4. Shqyrtimi i Raportit të Punës të Kryetarit të Komunës për vitin 2022;

Kryetari – Faleminderit. Raporti është publik, mund ta merrni në web-faqe zyrtare të komunës. Në raport janë zotimet, prioritetet, synimet, qëllimet, raportet e zyrave të kryetarit si dhe raportet e të gjitha drejtorive përfshirë edhe Zyrën Komonale për Komunitete dhe Kthim. Besoj që keni pasur kohë ta lexoni raportin, unë i mirëpres çfarëdo që vlerësoni, vërejtje dhe sugjerime.

Lirigzon Kastrati – Faleminderit kryesues. Dëshiroj të flas në fokus të veçantë për prioritetet dhe synimet për vitin 2023 si dhe sfidat gjatë kësaj periudhe. Tek pjesa e prioriteteve, kryetari i komunës i ka përsëritur vazhdimisht. Projektet a duhen të jenë projekte të reja apo vazhdimësi, kryetar?. Siç po shihet kryetari i ka përdorur disa projekte jogjithëpërfshirëse. As në raportet e vitit 2020-21-22 nuk ka pasur ndonjë projekt konkret për fshatrat Hoçë e Vogël, Brestoc dhe konsideroj që qytetarët e këtyre fshatrave janë diskriminuar dhe janë lënë anash. Në fund një pyetje për kryetarit të na tregojë se cilat prioritete ka arritur t’i përfundoj në dy vitete e fundit specifikisht dhe cilat synime ka arritur që t’i bëjë prioritete?

Kryetari – Faleminderit Lirigzon. Sa kohë të jem kryetar, pjesa e qëllimeve dhe prioriteteve nuk do të ndryshojë asnjëherë. Por, ti duhet t’i lexosh raportet e drejtorive, aty specifikohet se cilat projekte konkrete janë realizuar në Hoçë të Vogël dhe Brestoc. Një koment për qytetarët e komunës së Rahovecit; Nga 84 premtimet e programit tim qeverisës, 16 janë përmbushur plotësisht në 6mujorin e parë, 16 janë gjysmë të përmbushura dhe 27 janë të filluara, 24 janë ende të pafilluara. Në 6 mujorin e dytë, sigurusht që do ta shtojmë numrin e zotimeve dhe premtimeve të mbajtura. E keni edhe raportin e institutit GAP dhe do ta shihni që në republikën e Kosovës, nuk ka kryetar që shkallën e realizimit të premtimeve e ka më të lartë. Mund ta lexoni raportin në detaje.

5. Shqyrtimi dhe miratimi i propozim-vendimit për Planin e Punës të Kryetarit të Komunës së Rahovecit për vitin 2023;

Kryetari – Jemi të ndërgjegjshëm dhe të vetëdijshëm për ecurinë dhe angazhimin e punëve dhe sfidave, pamjaftueshmërisë së buxhetit etj... Në çdo fundvit është bërë tashmë praktike (edhe performanca e kërkon) të diskutojmë rreth projekt-planin e punës së kryetarit të komunës dhe qeverisë komunale për vitin vijues. Ky plan i punës ka qenë në diskutim publik dhe tani është me të gjitha procedurat e përfunduara. Kuvendi duhet t’ia jep miratimin kryetarit të komunës që më pas në 2023 të funksionalizohet me punë.

Sjfullah Sejfullahu – Kryetar, sa herë jemi diskutuar, po thua që viti 2022 ka qenë me probleme. Ju si kryetar, qka keni planifikuar për vitin 2023 diçka që e dallon prej vitit 2022, mos të jetë rutinë çdo herë.

Asaj Latifi – Faleminderit. Ndryshimin digjital me një kontratë të re për gjithë komunën e Rahovecit. Kontratat që tani kanë funksionuar për shkak të rritjes së çmimeve ose për shkak të pritjes së subvencionimit nga Qeveria, do t'i përcaktojmë ose do t'i detyrojmë të punojnë. Në planin e punës ka qenë edhe fillimi i ndërtimit të sheshit qendror, por tani është faji ynë sepse lënda në OSHP ka qëndruar dy muaj. Në 2023 e kemi fillimin e pandalshëm të sheshit qendror. Rruga 4 korsi do të ketë një dinamik tjetër, do të nisin së ndërtuari shumë shkolla. Lajm i mirë është që prashihet të ndërtohet Qendra për Inovacion Kultur dhe Arte (në mars do të shpallet procedura e prokurimit). rrugë, Do të ketë ndërtim të rrugëve - rrugicave dhe trajtim të ujërave të zeza. Do të filloj të ndërtohet projekti i madh i bashkëpunimit mes Qeverisë dhe Komunës – Zona Ekonomike. Janë hapur kodet për kolektorin në Krushe, në Xërxë dhe Ratkoc. Kompleksi sportive do të përmbyllet, AMF në lagjen e epërme do të përfundojë, do të përfundoj Sheshi në Qendër, gjithashtu edhe Sheshi i Republikës dhe shumë projekte që kanë nisur më herët do të përfundojnë.

Kryesuesi – Faleminderit kryetar. Nëse edhe dikush nuk ka diçka për të thënë, atëherë po e vendosim në votim. Kush është për?... Me shumicë unanime aprovohet edhe propozim-vendimi për Planin e Punës të Kryetarit të Komunës për vitin 2023.

6.Shqyrtimi dhe miratimi i propozim-vendimit për Planin e Punës të Kuvendit Komunal për vitin 2023;

Skender Hamza – Faleminderit kryesues. Përshëndetje për kryetarin, nënkryetarin, drejtorët dhe gjithë kuvendarët. Për aq jush e keni draft-planin e punës së kuvendit për vitin 2023, të cilin e kemi përgatitur ne si Zyrë e Kuvendit në bashkëpunim me kryesuesin. Plani në fillim e ka pjesën tekstuale dhe më pastaj tabelarët me pika të rendit të ditës për 12 mbledhje ka 12 muaj të vitit. Ky draft-plan ka qenë në diskutim publik nga data 15.11.2022-15.12.2022. Me datë 29.11.2022 është mbajtur diskutimi publik qytetarë në këtë sallë ku pjesëmarrja për fat të keq ka qenë joekzaktshme. Me datë 12.12.2022 me ndihmën e OSBE-së kemi mbajtur një punëtori në restorant “Natyra”-Fortesë, ku kanë qenë të ftuar ekzekutivi, KPF-ja, kryesuesi i Komitetit për Komunitete, kryesuesja e Komitetit për Shëndetësi dhe kryesuesja e Komitetit për Arsim. Në atë punëtori janë diskutuar disa propozime duke i përfshirë në draft-planin e punës 2023. Nëse keni ndonjë vërejtje ose propozim, jemi në dispozicionin tuaj për plotësime.

Kryesuesi – Faleminderit Skender. Faleminderit për përgatitjen e këtij draft-planit si Sekretari e Kuvendit. Një kritikë për anëtarët e ftuar në tryezën e cila është organizuar për diskutim për planin e punës së kuvendit, pjesëmarrja e tyre ka qenë e zbehtë. Atëherë Sekretaria e Kuvendit e ka edhe një propozim për ta vendosur në diskutim këtu në seancë rreth planit të punës.

Skender Hamza – Faleminderit kryesues. Ne si Sekretari e kemi një propozim rreth procesverbalit. Për momenti ky që është, nuk është procesverbal por është transkriptë (fjalë për fjalë). Me shumicën e komunave që kemi kontakte, të gjitha e kanë procesverbalin d.m.th thelbin e asaj që diskutohet. Kërkojmë mbështetjen tuaj që edhe ne ta praktikojmë procesverbalin ashtu siç duhet dhe secilit kuvendarë do t'i bashkangjesim edhe linkun e seancës.

Sejfullah Sejfullahu – Jo rreth procesverbalit, por rreth kujdesit më të shtuar të juristave të komunës – Zyrës ligjore, që MAPL-ja mos t'i kthej vendimet e votuara në kuvend, të kemi kujdes më tepër.

Kryesuesi – Si kuvend komunal i komunës së Rahovecit jemi shumë më mirë se komunat tjera sa i përket kthimit të ligjshmëris nga autoriteti mbikëqyrës dhe poashtu besoj që Zyra Ligjore gjatë hartimit të vendimeve të kujdeset më shumë.

Hasan Përboqi – Atëherë rreth propozimit të Sekretarisë, ne si grup e përkrahim këtë propozim sepse të gjithë jemi dëshmitarë këtu që po bëhen diskutime të shumta dhe ndonjëherë ka ndërhyrje gjatë diskutimeve nga ai që e ka fjalën dhe nuk është e lehtë të shkruhet fjalë për fjalë transkripta.

Kryesuesi – Faleminderit. Atëherë edhe unë pajtohem me këtë propozim dhe patjetër e vendosim në votim. Në rastet specifike në çështje të caktuara mund të bëni kërkesë në Sekretari për transkriptë. Kush është për?... Atëherë me shumicë votash koorporohet edhe ky propozim në planin e punës së kuvendit. Si të tillë po e vendosim në votim

pikën e gjashtë të rendit të ditës. Kush është “për”?... Me shumicë unanime miratohet edhe kjo pikë e rendit të ditës.

7. Shqyrtimi dhe miratimi i propozim-vendimit për Planin e Punës të Këshillit Komunal për Siguri në Bashkësi (KKSBB) për vitin 2023;

Nënkryetari – Faleminderit i nderuar kryesues, drejtorë, të nderuar asambleistë. Para vetës e keni planin e KKSBB-së me të gjitha procedurat e përfunduara dhe kërkohet miratim formal, sa për dijeni kryesuesi i këtij këshilli është vet kryetari i komunës.

Kryesuesi – Faleminderit nënkryetar. A ka dikush prej anëtarëve diçka për të thënë?... Nëse jo, atëherë po e vendosim në votim, kush është për?... Me shumicë votash aprovet edhe pika e shtatë e rendit të ditës.

8. Shqyrtimi dhe miratimi i propozim-vendimit për Planin e Vlerësimit të Rreziqeve nga fatkeqësitë natyrore dhe fatkeqësitë e tjera;

Përparim Krasniqi – Faleminderit kryesues, përshëndetje kryetar, përshëndetje për të gjithë. Faleminderit për rikthimin e dy pikave që kanë qenë të obligueshme për afatet ligjore që na presin. Sa i përket planit të rrezikut të komunës së Rahovecit, nuk do të zgjatëm shumë, është një dokument që për herë të parë është në komunën e Rahovecit duke angazhuar edhe ekspert të jashtëm për rregullimin e këtij dokumentacioni.

Kryesuesi – Faleminderit drejtori. Nëse dikush prej anëtarëve nuk ka ndonjë diskutim rreth kësaj çështjeje, atëherë po e vendosim në votim. Kush është për?... Me shumicë votash aprovet edhe pika e tetë.

9. Shqyrtimi dhe miratimi i propozim-vendimit për Planin e Transportit Rrugor 2022 – 2027;

Përparim Krasniqi – Para vetës e keni dokumentin e planit të transportit rrugor 2022-2027 si dhe planin e mobilitetit, dallimi në mes këtyre dy planeve është sepse plani i mobilitetit ka të bëjë me pjesën më të madhe të zonës urbane të qytetit, ndërsa plani i transportit rrugor lokal ka të bëjë me rrethinën e komunës së Rahovecit në tërësi.

Kryesuesi – Faleminderit. A ka dikush ndonjë pyetje rreth Planit të Transportit Rrugor?... Nëse jo, atëherë po e vendosim në votim, kush është për?... Me shumicë votash aprovet edhe pika e nëntë.

10. Shqyrtimi dhe miratimi i propozim-vendimit për Planin e Mobilitetit Urban 2022 – 2027;

Përparim Krasniqi – Plani i Mobilitetit është një dokument shumë i rëndësishëm i komunës së Rahovecit, ka afatin 5 vjeçarë. Për sugjerime do t’iu jemi mirënjohës.

Kryesuesi – Faleminderit drejtor. A ka dikush diçka rreth kësaj pike?... Nëse jo, atëherë po e vendosim në votim, kush është për?... Me 16 vota “për” miratohet edhe pika e dhjetë e rendit të ditës.

11. Shqyrtimi dhe miratimi i propozim-vendimit për mbulimin e shpenzimeve të varrimit për vitin 2023;

Saranda Sallteku – Faleminderit kryesues, përshëndetje për të gjithë. Në bazë të ligjit për vetëqeverisje lokale si dhe statutit të komunës së Rahovecit, kryetari i komunës i propozon kuvendit miratimin e vendimit, me të cilin i lejohet kryetarit që në interes të qytetarëve në emër të mbulimit të shpenzimeve të varrimit të vitit 2023, të lidh marrëveshje me të gjitha bashkësitë fetare në komunën e Rahovecit. Pakoja e shërbimeve primare do të definohet në marrëveshje të re dhe nuk mund të ketë koston më të lartë se 220 euro. Gjithashtu në KPF nënkryetari e ka përmendur të shtohet edhe një paragraf që në rast se varroset ndonjë veteran i UÇK-së, të shtohen plus 200 dhe i bie 420euro.

Rasim Fazliu – Faleminderit drejtoresh për prezantimin. E kemi mirëpritur këtë punë çdo herë, sepse është një prej punëve më të qëlluara që është bërë ndonjëherë, duke iu dalur në ndihmë qytetarëve në momentet më të vështira. Desha të ndalem te pika 2, ndoshta e ke gabim, ku thotë: Pakoja e shërbimeve primare do të definohet në marrëveshje të re dhe ajo nuk mund të jetë kosto më të lartë se (me numra është 00.00) e në anën tjetër 200euro. Ky është dokument zyrtar dhe duhet të jetë i shkruar drejtë dhe mirë.

Sinan Kryeziu – Faleminderit kryesues, përshëndetje për të gjithë. E përgëzojmë Drejtoreshën e Shëndetësisë për këtë iniciativë, gjithashtu e përkrahim çdo herë.

Kryesuesi – Atëherë nëse dikush nuk ka ndonjë diskutim tjetër, po e vendosim në votim bashkë me propozimin që e bëri drejtoresha dhe me vërejtjen nga z. Rasim. Kush është për?... Me shumicë unanime miratohet propozim-vendimi për mbulimin e shpenzimeve të varrimit për vitin 2023.

12. Shqyrtimi dhe miratimi i propozim-vendimit për miratimin e Simbolit Përkujtimor të Gjenocidit në Kosovë;

Kryetari – Faleminderit. Jemi njëra ndër komunat që e kemi përjetuar rëndë dhe e kemi plagë të hapur gjenocidin serbë në Kosovë. Ka ardhur koha ta miratojmë këtë simbol i cili na përkujton që në këto troja ka pasur gjenocit dhe ka ushtruar dikush gjenocid. Nuk dyshoj që me unanimitet aprovohet.

Hasan Përboqi – Ne si grup i asambleistave të Aleancës e përkrahim në plotni miratimin e llogos unike (lulëkuqja me katër petale), e që me votën tonë si kuvendarë do të jetë edhe simboli i përkujtimit të gjenocidit serb të ushtruar ndaj shqiptarëve të pafajshëm në Kosovë. Meqë jemi afër 15 janarit (dita e shënimit të gjenocidit serb në Kosovë), miratimi i këtij simboli nga kuvendi komunal i Rahovecit, është mënyra më e mire për ta përquar mesazhin se përballë krimit dhe gjenocidit të ushtruar nga armiku shekullor serb ndaj shqiptarëve, ne jemi të bashkuar.

Sejfullah Sejfullahu – Faleminiderit. Si vendas i një vendi ku ka ndodhur gjenocidi (Krushë e Madhe), e përkrahim në plotni dhe shpresojmë që në të ardhmen institucionet ndërkombëtare dhe vendore të bëjnë më shumë se sa llogoja.

Kryesuesi – Faleminiderit Sejfullah. Nëse dëshiron të deklarojë edhe dikush prej grupeve tjera?... Nëse jo, atëherë po e vendosim në votim. Kush është për?... Me shumicë unanime aprovohet propozim-vendimi për miratimin e simbolit përkujtimor të gjenocidit në Kosovë.

13. Shqyrtimi dhe miratimi i propozim-vendimit për ndryshimin dhe plotësimin e vendimit 01 Nr.263/22, i datës: 25.01.2022, për themelimin e Komitetit për Politikë dhe Financa;

Hasan Përboqi – Faleminderit kryesues. Kemi pasur lëvizje brenda grupit parlamentar. Shefja e grupit që ka qenë edhe anëtare e KPF-së është bërë drejtoresh, si obligim ligjor e kemi edhe zëvendësimin e anëtares. Anëtare të re në KPF, e propozojmë zonjën Shqipe Kryeziu.

Kryesuesi – Faleminiderit Hasan. Atëherë Shqipe Kryeziu (AAK) është e propozuar për anëtare e KPF-së. Si të tillë po e vendosim në votim, kush është për?... Me shumicë unanime aprovohet edhe propozim-vendimi për ndryshimin dhe plotësimin e KPF-së.

14. Shqyrtimi dhe miratimi i propozim-vendimit për shpalljen në interes të përgjithshëm të parcelës P-01041-1 – në zonën kadastrale Xërxë;

Afrim Oruqi – Faleminiderit kryesues. I nderuar kryetar, nënkryetar, kolegë drejtorë, të nderuar kuvendarë. Sipas ligjeve në fuqi, para jush keni propozimin e kryetarit të komunës për shpalljen në interes të përgjithshëm të parcelës 1041-1 në Xërxë, me pronar Hysni Vehbi Thaqi me sipërfaqe prej 14 ari e 72m katror. Qëllimi i shpalljes së interesit të përgjithshëm është këmbimi i pronës publike me private.

Kryesuesi – Faleminiderit drejtor. A ka dikush diçka rreth kësaj qështje?... Nëse jo, atëherë po e vendosim në votim, kush është për?... Me 17 vota për aprovohet edhe pika e 14 e rendit të ditës.

15. Shqyrtimi dhe miratimi i vendimit për ndryshimin dhe plotësimin e vendimit 01 Nr. 338/22 i datës 29.06.2022 për dhënien në shfrytëzim afatshkurtër;

Erhan Morina – Faleminderit kryesues. I nderuar kryetar, nënkryetar, drejtorë, anëtarë të kuvendit. Para jush keni materialin për plotësim-ndryshimin e vendimit Nr.338/22 të datës 29.06.2022 për dhënien në shfrytëzim afatshkurtë të pronës së paluajtshme. Kërkohet që pika 2.1/2.5/2.7/2.8 të shfuqizohen nga vendimi bazik, ndërsa pikat tjerat të mbesin të pandryshueshme. Arsyetimi është se në këtë zonë kadastrale ka pasur kërkesë për këmbim të parcelave dhe si pasojë e kësaj ne si drejtori, nuk kemi mundur të vazhdojmë të procedojmë më tutje këtë vendim.

Kryesuesi – Faleminderit drejtor. Nëse dikush nuk ka diçka rreth kësaj pike?... Atëherë po e vendosim në votim, kush është për?... Me 20 vota “për” aprovohet edhe pika e 15 e rendit të ditës.

16. Shqyrtimi dhe miratimi i vendimit për ndryshimin dhe plotësimin e vendimit 01 Nr. 341/22 i datës 29.06.2022 për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës;

Erhan Morina- Para jush keni materialin për plotësim-ndryshim të vendimit me nr.341/22 të datës 29.06.2022 për krijimin e komisionit i cili ndërlidhet me vendimin paraprak.

Kryesuesi – Faleminderit. Nëse nuk ka dikush diçka për të thënë?... Po e vendosim në votim, kush është për?... Me shumicë unanime miratohet edhe pika e 16-të e rendit të ditës.

17. Shqyrtimi dhe miratimi i raportit mbi regjistrimin dhe vlerësimin e dëmeve në amvisëri, ekonomi familjare dhe biznese, të shkaktuara nga vërshimet e shiut me datë 17 shtator 2022;

Erhan Morina – Në këtë pikë të rendit të ditës po paraqesim raportin e dëmeve që kanë ndodhur me 17 shtator të këtij viti, si pasojë e të reshurave të shiut. Bëhet fjalë për dëme në ekonomi familjare, amvisëri dhe biznese. Rregullorja nr.17/2015 obligon që raportet e dëmeve t'u nënshtrohen kuvendit për miratim para se të dërgohen në qeveri. Vendet më të prekura nga këto vërshime janë: Fshati Ratkoc, Celinë, Fortesë, Krushë e Madhe dhe Radostë. Gjithsej janë vlerësuar 333 ekonomi familjare dhe amvisëri me vlerë të dëmeve rreth 1.1192.509euro. Të prekura nga vërshimet kanë qenë edhe 10 biznese me vlerë të dëmeve 77.285 euro.

Kryesuesi – Faleminderit drejtor. A ka dikush prej anëtarëve të kuvendit ndonjë gjë rreth kësaj pike?... Nëse jo, atëherë po e vendosim në votim, kush është për?... Me shumicë unanime aprovohet edhe pika e 17-të.

18. Informatë rreth gjendjes në terren pas të reshurave të fundit në territorin e komunës së Rahovecit.

Besmire Bytyqi – Faleminderit kryesues. I nderuar kryetar, nënkryetar, drejtorë, asambleistë. Pas kërkesës të shefit të grupit të LDK-së z. Burim Krasniqi në KPF, ne e kemi sjellur informatën. Komuna e Rahovecit në gjysmën e parë të muajit dhjetor është përfshirë me të reshura të dendura të shiut duke krijuar situata pak të vështira për qytetarët. Që nga vërshimet e muajit shtator, që si pasojë komuna jonë u godit nga dëmet e konsiderueshme, kemi ndërmarrë menjëherë veprime konkrete në pastrim dhe hapje të kanaleve-përrockave në tërë territorin e komunës sonë. Duhet ta cekim edhe intervenimin që është bërë nga FSK-ja në hapjen dhe pastrimin e lumit Bellaja. Njësia e zjarrefiksëve ka pranuar vetëm tre raste të raportuara (intervenimeve të lehta).

Kryesuesi – Faleminderit drejtoresh. A ka dikush diçka rreth kësaj informate, nëse jo, kalojmë te pika e radhës.

19. Plotësim-ndryshimi i vendimit 01 Nr.264/22 i datës 25.01.2022 për themelimin e Komitetit për Komunitete;

Hasan Përboqi – Faleminderit kryesues. Pasiqë zonja Shqipe Kryeziu ka kaluar si anëtare e rregullt e KPF-së, si zëvendësim propozojmë zonjushën Dorentina Sopjani (AAK).

Lirigzon Kastrati – Më e udhës do të ishte që fillimisht të shfuqizohet ky vendim, më pas të miratohet i riu që dërgohet në MAPL.

Kryesuesi – Sidoqoftë ndryshimet janë në të njëjtën seancë dhe nuk besoj që renditja është aq e rëndësishme. Atëherë vendi në Komitetin për Komunitete plotësohet nga Dorentina Sopjani dhe si të tillë po e vendosim në votim. Kush është për?... Me shumicë unanime aprovohet edhe plotësim-ndryshimi për KK.

20. Plotësim-ndryshimi i vendimit Nr.392/22 i datës 25.11.2022 për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës.

Përparim Krasniqi – Faleminderit kryesues. Në seancën e kaluar është marrë një vendim për formimin e komisionit për dhënien e ofertave dhe zbatimin për pronë të paluajtshme të komunës, fjala është për ankandin të deponisë ilegale të mbeturinave, mirëpo për shkak që Nora Boshnjaku është anëtare dhe nuk mund të jetë në këtë komision, ajo është anëtare në komisionin e ankesave. Për këtë arsye duhet ta bëjmë plotësim-ndryshimin dhe kryetari i komunës duhet ta propozoj dikë tjetër.

Kryesuesi – Faleminderit drejtor. Atëherë Nora Boshnjaku largohet nga ky komision, për t'ia liruar vendin një propozimi tjetër që tani do ta bëjë kryetari.

Kryetari – E propozoj Besmire Bytyqin.

Kryesuesi – Atëherë Besmire Bytyqi është përfaqësuese nga ekzekutivi i komunës në këtë komision në vend të Nora Boshnjakut. Si të tillë po e vendosim në votim, kush është “për”?... Me shumicë unanime aprovohet edhe plotësimi i vendimit për këtë komision. Me këtë pikë, po përfundon edhe rendi i ditës, në ora 16:00 në restorant “Bjeshka” jeni të ftuar për darkën e fundvitit. Urime festat.

Procesmbajtësi:

Albion Krasniqi

